

# «Sun fitg losch dal sustegn giuvenil»

Christian Rathgeb: Entschatta dal cumbat electoral

DA GION NUTEGN STGIER / ANR

■ Il cusseglier guvernativ Christian Rathgeb è stà avant 30 onns in dals iniziants da fundar la Partida giuvna dals liberals grischuns. Ussa s'engaschan gist ils giuvens cun plain entusiassem per ina reelecziun dal magistrat. Quai fan els cun in'acziun fitg simpatica e persunala. En bunamain dus mais han lieu las elecziuns chantunales per la regenza e per il cussegl grond. Gia dapi intginas emnas è il cumabt electoral lantschà, saja quai tar las persunas en uffizi, tar novs candidats e candidatas e lura er tar las partidas. Ier ha la Partida liberaldemocratica dal Grischun envidà ils meds da massa a l'entschatta electorala per ses candidat per la regenza, cusseglier guvernativ Christian Rathgeb. El è sa musà ventiraivel da l'interess davart ils represchentants da las medias ed er engrazià a tuts per ils numeurs rapports bainvulents.

## Davos mes uffizi stat in team serius

Cun plaschair candideschia el per ina ulteriura perioda d'uffizi, ha ditg Rathgeb. El sa chattia er bain en ses departament ed el veglia er anc ils quatter proxims onns restar commember da la regenza. Segir na vegnia el betg a dismetter quel mandat executiv per in mandat naziunal, ha punctuà il schef dal departament da giustia, polizia e sanità. Il success ch'el haja gè ils davos quatter onns saja er in grond merit ed il resultat da ses entir team. Ses collavurats e sias collavuraturas prestian lavur seriusa, fidada e professiunala. Grazia ad els ed ellas saja er stà pussaiv-



Admiran cuminaivel in dals diesch placats electorals dals giuvens liberals grischuns: Raphaela Hollinger, cusseglier guvernativ Christian Rathgeb e Thomas Bigliel (da san.).

FOTO G. N. STGIER

vel da realisar per exempel la revisiun totala da la lescha da sanadad e da la tgira da malsauns. Er l'engaschament da mintgin en connex cun il Forum mundial d'economia a Tavau, en Mesolcina tar il grond incendi dal guaud ed er la lavur exemplarica fatga tar las boas a Bondo l'avust passà sajan in grond merit da numerusas persunas

da ses departament, ha accentuà Rathgeb.

## Er grazia a la basa

El saja fitg cuntent d'avair per ses cumbat electoral a disposiziun ina squadra fitg liberala, plain vita e lura er versada. A la testa da quella stattan Anna-Margreth Holzinger sco presidenta, Jann

Hartmann, Silvio Zuccolini, Thomas Häusermann e Rico Monsch. In fatg plaschaivel saja però er che las secziuns regiunales e localas e quai en l'entir chantun sajan fitg activas e sustegnian ferm sia candidatura, ha menziunà il cusseglier guvernativ. Las proximas emnas saja el adina sin via, e quai cun grond plaschair, per esser da la partida a nu-

merusas occurrenzas en connex cun las elecziuns chantunales. Sias finamiras tar ina reelecziun en la regenza sajan da s'engaschar vinavant per in Grischun sco lieu da furmazium, d'abitar e da lavur attractiv. La segirezza da la populaziun e da mintgin saja er da gronda impurtanza. Ultra da quai duess il provediment sanitar d'auta qualitat esser garantì en l'entir chantun, ha menziunà il candidat liberal per la regenza. El veglia er esser vinavant in cusseglier guvernativ per tuts Grischuns, per mintga regiun linguistica e cunzunt er per dar en il futur impuls liberals a la regenza, e quai a favur dal Grischun cun sia gronda diversità.

## Ina campagna fitg persunala

Sustegn en ses cumbat electoral e quai en ina moda fitg persunala survegn Rathgeb dals giuvens liberals da noss chantun. Cun ina campagna da placats fan els attent a la reelecziun dal cusseglier guvernativ. Proximamain pendan diesch differents placats en ils lieus nua ch'ìls giuvens liberals èn da chasa. Lur passiu persunala cumbineschan els en pled e maletg cun la lavur e las abilitads da Rathgeb. Cun quella acziun singulera vulan ils mats e las mattas animar vegl e giuven da dar la vusch al schef dal departament da da giustia, polizia e sanità. El saja satisfatg da quella voluntad dals giuvens liberals ed er fitg engraziavel, ha ditg Rathgeb. L'acziun confermia che per l'avegnir liberal saja procurà cun avoir giuvens liberals uschè activs, ha concludì il cusseglier guvernativ. «Jau sun fitg losch dal sustegn giuvenil.»